

六一山房詩集

序

吾鄉詩家宋明爲盛濶山屬對盤硬語於昌黎西麓清
辭賦沿於杜曲號過江之詩祖管庫行吟推昌谷之
鬼才疏秦健舉四明社長凱歌爭徐渭之豪萬歷相臣
遺筆奪東阿之秀登壇拔幟伯翼披猖滿縣栽花長卿
落拓下逮滄海之際益工汝社之篇砌里善鳴鄧山偕
作遊蹤紀勝孟東野之沈思埋髮書銘屈左徒之哀響
千秋繼軌一藝專門雖非百家兼綜之長已極兩代詞
人之選家兄覺軒先生丹山孕秀名圃探精衍世業之
清芬譽奇童之蚤慧牽衣就塾依然景伯之聽弱冠游

庠允矣吳公之薦岱山自作家有藏書麗澤交資門多

益友遂乃浸淫卷軸如對古人探索幽微遞成新製積

廿年之晷刻不懈稽求擷四部之菁英自相排比韓嬰

詩傳箋解通明

韓詩箋

周官職方源流審諦

周官職方解

海右

繫年之錄別志乘而單行

明州繫年錄

歐陽方鎮之編補姓

名於斜上

唐書方鎮表考證

蘭臺秘籍採典午之亾書

晉書略

簡古文拾師春之牘語

竹書紀年拾遺

浙中令長博收吳越以

兩浙令前長考

甬上詩篇備錄宋元之代

甬上宋元詩略

網羅旣富

稿易再三端緒有條什成七八隆隆焉首首焉固足以
該眾能邁往詰也至若把酒論文翦鐙課藝守大家之

範沿泝柳歐擅儻語之長縱橫徐庾一篇脫稿咸詡通
材七歲能詩更推上品空中雷電挾靈氣而回翔劫後
江山助騷心之悲憤同谷杜陵之什老屋飄零河陽潘
岳之愁空牀轉側呼小妻而捧卷寒夜添香借羣季以
飛觴好春病酒出遊海外波濤縱鯨壑之觀作客都中
風雨灑鶯花之淚別有懷抱盡是傷心發爲詠歌遂稱
巨手或粲如麗錦或靜若秋花或脫帽以稱狂或揚旗
而整隊詠史之作高論漢唐閒情之詩弗刪鄭衛青邱
眾體都歸此集之陶鎔赤堇名區可續諸公之壇坫濂
少聞家學殊愧兄風每從請益之餘獲在校讐之列謝

庭裙屐對康樂而彌慙蘇氏文章慕樂城而無集敢以
蕪語綴此弁言將付手民毋嫌目混爲行人先導仿子
雲序之文傳作者苦心代法秀禪門之識

同治十一年二月朔同產弟濂謹序

六一山房詩目

卷一 丙午至辛亥

詩五十首 附二首

卷二 王子癸丑

詩五十三首

卷三 甲寅至丙辰

詩四十五首 附七首

卷四 丁巳至己未

詩六十首

卷五 庚申辛酉

詩六十八首

卷六 王戌癸亥

詩五十五首

卷七 乙丑至丁卯

詩四十九首 附一首

卷八 戊辰

詩八十二首

卷九 己巳庚午

詩五十四首 附二首

卷十 辛未

詩五十首 附四首

右詩五百六十六首覺軒先生作也先生研究經史學
有本原詩其餘事耳然根柢三唐兼該眾體感時詠史
諸作尤所擅長接述李何洵無愧色余愛之請刻以問
世先生乃刪其什六七而授之梓人同治十三年九月
同縣蔡鴻鑑識

六一山房詩集卷一 丙午至辛亥

鄆 董 沛 覺軒

丙午

過芍藥沚錢忠介公故第

相國祠堂在悲風捲樹涼大江東去恨流不到錢唐

古意

繁花媚簾影漾漾微波光舊時嬌少妹宛轉如我長纏
手理素縫織作君衣裳經以迴文機繡以雙鴛鴦慙慄
念離別道遠孰寄將孤琴亾與歡攬鏡空自傷

二

薄暮登高樓高樓杳無伴下見江水流隨風自舒卷江行不知遠客行不知返日落瀟湘煙孤舟已愁晚勞燕東西飛音書一何緩壓鬢珊瑚釵昨夜兩頭斷

平陵東

有序

古樂府有平陵東一篇哀翟太守作也余謂西漢之季幾人稱帝幾人稱王若不以成敗論則統莫正於數月之孺子而佐孺子以起兵者平陵人方望也哀其事諒其心卽樂府舊題作詩以表之

平陵東太守門人哀義公平陵東我弔方望之孤忠方

望平陵人西州尊爲賓長安不能召天水不能臣漸臺
傳首新莽死平林下江擁更始更始劉宗非故君王郎
公孫何論矣帝在定安二十年孺子其王吾事旣臨涇
草草謀興復隻手關中成一局豈不知蕭王奄起大河
北天命眞人眷有德豈不知南陽濟濟附鱗翼四七星
垣拱辰極故君尙在一綫存草莽微臣敢惜力臣不惜
力臣心癡天之所廢不可支丞相李松作封豕君臣駢
首死東市望雖死望不負孺子望不負孺子望不負高
帝如何平陵東不哀方望哀翟義

丁未

送友人

分袂河梁此別遙
挽畱不住水迢迢
夕陽西下君東去
影已先人度過橋

隴頭歌辭

隴山嵯峨隴水鳴咽萬命當危鼓慘弦絕

二

馳騖擊賊馬病日黑馬病路多日黑奈何

哭曹丈漁橋

敏

一赴修文召儒生作鬼雄浮身餘短劍浪跡歎飄蓬筆
墨叢殘後聲名黨錮中黃泉陳范在揮淚灑秋風

近聞

葱嶺迢迢瘴霧低近聞大將拜安西時新疆有警
西將軍朝命布彥泰爲定關門重鑰醒魚眼驛道飛符送馬跋戈壁巖催警箭幕庭荒迴待春犁煌煌開惑

高宗論頑與諸軍作指迷

二

天外無緣炤覆盆伊州幕府將權尊清淮早制庚辰鎖
荒土能開戊己屯萬里戍邊唐赤子千年立國漢烏孫
綯綯紅柳師行路好遣春風度玉門

三

飛報

綸音下禁闈近臣拜

命賜寒衣金人不敢銷林邑鐵甲何能破樹機雪凍陰
山蘇武節星纏隴右魏公旂健兒感激

天恩重指日鷹揚大合圍

四

八載功勳一旦收

謂張格長威勇公爾之變長齡昭武侯遇春當

日稟

神籌金山月落擒車鼻玉水冰寒破尉頭屬國名王留
侍子漢家都護錫通侯東陽沃雪尋常事看置關西六

八郵

戊申

送盧星輝友燦之杭州

青天何高高白日照梓里丈夫意氣中貧賤有知己念
我同心人行將渡江水江水莽東迴龕赭夾門峙日落
伍相祠鼉鼓夜不起願子一葦杭安穩道如砥

二

秋風飄然來肅肅鴻雁翔木葉疏以落遊子登河梁俯
視流水清仰視明月光明月照我帷亦照君衣裳長空
一片雲吹落君之旁如何望雲思渺渺天一方

三

長亭置杯酒與子話離別亭外孤蛩鳴其聲亦嗚咽我已心惻快聞之益淒絕對酒殊不歡宛轉託詩筆碧水君泛鷗青山我捫蝨涼飆八月天秋士竟無褐

四

一日不見子思子如三秋况以行路難天地容孤舟舟行過西湖湖水皆清流清或如子心濁已如我愁揮手散萬塵茫茫登海樓飄蓬不轉影身世同蜉蝣

鷺

寒隼碧空飛平原臘落暉風霜憐我瘦雉兔爲誰肥俊

骨秋逾健高心夜未歸九霄雲路近莫更向人依

同舍弟訪高尙宅故址

林鳥溪魚自在閒高風落落有誰攀卻將一卷還鄉集
畱與明州作祖山

同作

董濂震軒

先生歸去來到今已千載林泉高尙風蕭然絕人外
古樹交枝柯屏山作圖畫下有溪流聲悠悠送天籟
游魚靜不驚蕖荷立如蓋盟此白水心濯纓清可愛
羣流急趨下誰能知勇退西望嚴子陵獨坐客星瀨

奉化道中

晴日催孤櫂遙遙見數峯千家惟種麥十里盡栽松高
樹盤秋鵠靈潭吼夕龍山中有真隱不敢笑邨農

哭袁月樓孝廉師

世恒

大江東北流一息達千里平生知我恩轉眼邈如水初
聞公病耗我夢夜不救猶謂公體強皇天豈容死客來
登我堂謂公身逝矣命棹一訪之輕舟岸傍艤登岸步
逡巡高門揭旛紙或恐鄰近訛尙問死誰是轉思公無
鄰公病竟不起入門聞哭聲哭聲贖餘哀哭聲慘不聞
寒燈逼牀裏登牀褰孤幃兩眼淚如洗公死爲昨朝我
來隔日耳悔不早訪公朝夕爲公侍猶使公病眶見我

因公涕鳴呼我負公此生曷能已謁公自此終憶公自此始吾鄉重華胄三袁鼎同峙南宗多大儒益深我翹企頗憂晚近來橫波勢難匯公也一振之狂瀾挽頽靡左思胸卓奇崔從貌嚴偉倒奕槌懸風韓文語泣鬼公也一兼之隻手具百體弱冠博子衿峩峩弁有頰屢作錢塘遊江廣縱一葦三十賦成均四十正強仕讀書貢明廷天門近在咫吐氣雄萬夫下視掃糠粃而以悱惻心紆迴及賤子賤子少習文不肯墮塵昧掎摭星宿空狂口肆張哆公笑矜其愚納之九方軌深入乎渺中談天闢微旨回首十載前流光去如矢先君開講堂盈門

種桃李我受易與詩公遺子若弟兩世稱通家年少重

知已

時與公弟世濟同學

是時公數來到門色先喜夙知道
範尊瞻依恐無似盼公月旦評嘉與及駕駘謂此甯馨

兒頗見具根柢先君笑謂公賊恩古所鄙行當遣趙商

來事鄭北海潤以詩書華甘白受和采嗚呼言在衷蒼

天理無改如何狂飆飛寒聲落羣卉痛矣喬木摧無父

竟何恃公來弔孤兒見我穎有泚相顧各失聲悽悽寫

哀誄我以先君言追隨公杖屢惠我真無私傾篋而倒

篚忠宣解麥舟子敬贈囷米一以公視之奚讓古人美

壓屋孤月沈迎門朔風颺父死乃有公我生尚無悔巖

巖東嶽峯行遠道在邇一旦歌其頑夢莫悵殷陞青天
苦無階黃泉苦無淚我來弔公魂歌聲變商徵公生我
乃負修脯不成禮公死我何依有首向誰謳願以我夢
魂索公舊容止空山無片雲鬼語叩冰齒日落天堂堂
湖波斷沙尾

己酉

出門

梧桐一葉落古樹皆成秋出門百日期如懷子歲憂理
我安道琴添我平仲裘檢視囊篋中催僕登行舟寒蛩
織籬落獨雁悽汀洲顧此百端集黯黯生離愁

二

再拜辭高堂高堂病在牀低言囑諸弟湯藥須親嘗有
妹年及笄未嫁依母旁聲聲問阿兄何時歸故鄉去時
叢桂開葉底凝秋霜來時嶺上梅料有南枝香

是科秋試改期

九月

三

宿昔談詩書意不慕榮利祇緣親在堂乃作祿養計風
雲無定期莘渭有遭際抗懷古賢人時來不可避而我
風塵中碌碌困征騎翹首天門高初願渺難慰

曹娥江晚渡

冥冥天已秋冉冉月將起泛泛木蘭艤悠悠渡江水渺
渺行役心慘慘愁未已寄我平安書明可到故里上寬
慈母懷慎勿念遊子

山陰道中

一棹山陰去疏林正早秋江湖餘短夢風雨且孤舟應
接知無暇飄零不自由茫茫千里雁齊下荻蘆洲

西陵懷古

未卜黃龍飲空聞赤帝來江潮三日靜軍府六家開餉
竭兵難守官輕事可哀錢唐波咫尺西渡尚徘徊

錢唐江觀潮行

錢江三折出海門英奇磅礴相吐吞潮來逆向江流奔
健如萬馬追風輪風輪百里一呼吸萬馬嘶空作人立
陽侯倨倨攔潮入江神迎之敢長揖時維八月天正秋
四山不動風颶颶日皇東升萬態露潮頭隱起一綫流
潮頭一綫平如畫潮神擁潮尙無力須臾浪蹴千朵花
道旁觀者各屏息衝津踏壁隨江隈勢險能折潮頭回
憑空擲下泰山頂遍地但作驚天雷雷聲轟轟聒人耳
太子深宮病能起屏絕萬籟無一聞金聲不鳴鼓聲死
蘆花滾滾寒雲飛江流欲東潮欲西兩險相薄益摩盪
金光閃爍魚鱗隄員也種也驅白馬層冰積嚴雪積瓦

霎時映入朝暉紅龕山不青赭山赭迎潮水手船如龍
飄檣矗立天半空渾渾庵庵不可制是何神力威且雄
隄防歲費大官築孰遏其鋒折其角臨安錢王十萬鏹
西陵匹婦一股肉武進黃生兩首詩空前絕後誰繼之
我乞枚叔筆一枝冥搜刻畫天地奇

鄂王墓下作

河山恢復寸黃金北望中原遺恨深若待功成始烹狗
英雄泉下亦甘心

題屠甫南宗裏望雲圖

望親不得見想像或見之生別已慘然況在親死時城

北屠君頭半白六十年華如過客終身猶作孺慕誠欲
以生魂追死魄死者吾父生者身酸風冷雨常苦辛吾
身雖生不如死吾見吾親餘此紙朝登太行山白雲依
依山之間以目望親不可見魄與魂通隔一綫以目望
親不見親以目望雲如望親望雲猶有雲斷時望親之
心無絕期望親如有吾親在耿耿虛靈叩眞宰題君之
圖益我悲我作孤兒已十載

登龍山絕頂望海

投足雲邊路豪情本少雙迴峯盤故寨環帶視長江風
起潛龍窟星羅貢鯛邦晚歸松月白驚吠隔花鳴

庚戌

人日飲楊司馬有之小紅書屋

天地畱孤跡江山話舊因一年初作客七日又爲人岸
草煙籠細園花雨釀春征帆高不挂何處是行塵

送李遵陸明經鴻之和闌八十韻

李子將西行腰佩刀雙錄醉我鸚鵡杯招我歌吳歎我
生不出門熟覽西域圖爲汝縷縷陳汝莫心危快丈夫
志四方萬里眞區區出彼玉門關經彼伊吾盧伊吾今
哈密西域稱通衢南行過注賓北行入稽胡天山瓦其
中山高逾銳鋩山中何所有青銅及碧琉璃樹周榆檉

其獸走鹿麅其水涵鱸鯈其林巢鷗鵠山前大戈壁行
客皆趨手如升木猱足如穿藤鼯踰險到闢展交河
橫前途交河明火州西南接危須行行布古爾沈沈龜
茲鄂北望賽里城而至阿克蘇屯軍八百人隊隊蒼龍
受登梯向高望鼎立山岨峿後爲烏什城前爲漢莎車
右循烏蘭河疏勒環重闢莎車更南渡玉河涵冰壺始
入于闢都叢山多夔麅回疆周萬里比屋蒙罽氳回莊
領千數伯克司城符其男連腮搦其女顏如嫫政令同
景教厥祖生唐初王曰派罕巴國在西洋隅造經三十
篇傳世二十餘嗣孫瑪墨特東遷開穹廬轉眼入瓦刺

駢首投羅罝幽囚瑪罕木墾地輸庸租

高宗蕩衛拉乃兄名尼都釋歸長舊部賚以千金族厥弟官伊犁錦馬青霞繻乃兄如梟羆厥弟如鼯鼈出彼樊龍中甘心爲穿窬自號巴圖汗百鬼相哮虜蠭茲三苗畔中天際唐虞

帝詔靖逆軍時命雅爾哈善爲靖逆將軍率彼驃騎趨一戰遽逸賊萬里賜屬鏤

帝命武毅公兆將軍惠賜汝三棱觚衣汝貂襪佩汝金鏤鑄汝其翦長鯨汝其驅封狐前隊排鏤戰後隊張網罿中軍大帥旗獵獵椎牲禡轉鬪英奇盤山場困沮淤烏

蘇塹鹿角萬馬皆噴咀亂呼觱栗聲鼉鼓雜以鼙鑼戰

三月餘金創穿骨髑驚動成勇侯

富將軍德

冒雪過廬朐兩

道薄賊壘鈴騎相跳踰逆酋替戾岡西向葱嶺逋奔騰

索倫騎絡繹大官帑再戰和什珠困賊如籌筭途窮竄

烏粃百口依人餉坦沙震天討軍門函頭顱塵氣誓一

掃醜黨免囚俘攜裝驅白駝犒軍封黑榆分置東西城

巍巍高垣臉有羊鬢其角有龜偏其趺有錢稅騰格有

木貢杷櫂徵糧帕特瑪鑄金索耳爐長感

天皇恩使我遺戎龢昔事準噶爾昂吉竭澤漁昔事和

卓木分去作刀礮脣今天照戎索

仁恩滋枯鯛安享太平福普爾家藏儲庚郵接百駟何
慮山嶽嶇君今行到此善保千金軀揚君赤珊瑚鞭乘君
紫駟駒華風尚儀節逢人躬曲疴此鄉饒金麌可以供
離腰此鄉多霜箭可以防萑苻若得出塞吟書之青雲
膜寄我示一編乘彼西風飈我今歌已終送君行躍躍
躍躍君已行有淚如溝淒霜颯厲鞍轡醉倒清醧酌

烏夜嘵

江頭樹烏夜嘵寒砧不輟搗落葉驚秋闌空牀一夕夢
遠向遼河西遼河之路千萬里夢郎爲魚妾爲水妾心
如水不斷流安得郎書寄雙鯉

張忠烈公畫像

詣得忠臣像鬚眉萬古新地無奔鬲路天重報韓人臘水殘山局峩冠博帶身凌煙高閣上肯與鄂襄鄰

讀武侯傳

三代兵農一治國卽治軍陳壽稱良史論古猶未純漢任武鄉侯西州民大和庶幾伊與周相業高參何卽其搗秦隴堂堂王者師所遇雖人傑來去一聽之壽也一孔儒將畧謂非長何以死後身猶能驚宣王

送羅山人

承德

歸湖州

旗亭楊柳拂春衣明月當筵酒力微惆悵江南風景異

藕花香裏送君歸

賦得潼關送孫思川

嶧

之秦中

久不晴干戈潼關險若何長途通太華遠勢逼黃河俯瞰中原廣雄屯戰士多君行應到此立馬望嵯峨

辛亥

樓烈士歌

有序

烈士名鎬字燕甫鄞人道光辛丑八月英吉利

陷甯波憤恨投江死戊申奉

旨入忠義祠

重關開胡兒喜將軍奔烈士死胡兒航海窺中原渤海

日落旌旗翻佛郎夜火震西礁輪牒直入蛟門關烈士
宣獻之子孫生平謹愿稱善人異軍蒼頭突然起行歌
躡躅鄞江濱蕃落羣酋悍於虎逆駛雲帆逞虓武城頭
倒旗悶鉦鼓將星紛紛墮若雨皇天私汝作男子手按
吳鈞髮上指殺賊不得身死之忠義昭昭有如水鄞江
三折迴海風碧血化爲鯨波紅臣雖布衣踐

王土笑彼食祿徒庸庸斬蛟渡口收骸骨烈士殉名此
奇節千秋俎豆鄉國祠

帝有恩言賜優卹

朝廷養士二百年終須正氣扶坤乾申徒蹈河連蹈海

可死則死餘生捐秋墳鬼哭狐鳴樹佩刀咽咽別人去
願書片石鎮波心烈士當年殉節處丈夫讀書賢聖期
殺身取義當如斯江口烈烈秋風悲素車白馬魂來歸
烈士之烈天鑒之

江行

紅樹青山外飄飄一葉舟夜涼人語靜風定櫓聲柔薄
酒難邀客單衣尚怯秋坐看孤月上歷歷數更籌

泊楓林壩

孤帆遙指越王城到得楓林已二更東舫客聞西舫語
上流水挾下流聲夢回故里家非遠秋入長江月倍明

臥聽蘆花風瑟瑟客途寥落易心驚

旅夜

庭樹秋風漸漸涼故鄉思客客思鄉情將三折之江比
江水猶輸九轉腸

送周參軍

炯

琴劍飄零客錢唐作勝遊一江吳越地兩代帝王州海
月孤城夢湘煙舊國秋送君帆影去惆悵獨登樓

和作

松滋周炯耿庵

同作他鄉客湖山壯此遊歸心隨楚月詩思寄杭州
短笛梅花譜孤帆桂子秋料知君有意懷我仲宣樓

客中聞洪船鄉明府起齋訃寄挽以詩

秋風寒逼人秋雲黯吾屋鄉訊一紙來中夜起燒燭開函具顛末掩淚不忍讀但聞四壁蟲聲聲助我哭美人隔秋水宛在天一方思之不可見展轉離愁長離愁尙不解况乃聞死喪淒然一寸心隨夢歸故鄉

二

生少不識君已識君之名褰裳渡河涉一酌廉泉清臨淄七萬戶

帝曰保障哉小人猶有母輒賦歸去來歸來杜里門依舊作寒士靜測予化遷天地渺生死歸來未十年溘焉

竟長逝客中愁予懷思君尙無已

三

我行七月七別君河之干分手登長途有淚不忍彈別後遺我書珍重留贈言謂當計日歸相與尋古歡君言猶在耳君書猶在案如何我歸來不復與君面爲刊有道碑爲補循吏傳執筆思銘君有淚已如霰

桃花渡

奔流三派繞州城急雨催潮勢不停塵世何嫌江水濁市樓猶帶海風腥西洋琛貝遐方集北渡帆檣過客經我亦一舟向東去蓬窗開處數峯青

登鎮海城

初日照重關，登臨縱大觀。
八方金鑑朗，萬馬鐵衣寒。
城對山容壯，天浮海氣寬。
魚龍猶出沒，何以慶安瀾。

候濤山懷古

蛟門對峙虎門雄，天限中原不再東。
幾見孫盧操勝算，儘煩譚戚著全功。
蕭疎樹色秋容淡，斑駁苔衣戰血紅。
極目滄溟無盡處，一聲長嘯海天空。

東門婦

驅馬東郭門，有婦哀且鳴。
問婦何爲者，夫婿遼東行。
辭家八千里，命與蛟龍爭。
高堂逼衰年，覈覈無弟兄。
側聞

海警厲殺戮以爲耕同舟半胡越消息誰死生妾夫去
八月瓶甕糧已傾孤兒擁敗絮手足寒於冰三日得一
餐猶乞鄰母羹望夫豈無石命亦鴻毛輕妾死不足惜
妾家無餘丁我聞思婦言惻惻悲我情揚鞭揖而去掩
淚不忍聽

從軍樂

寰海多賊蹤諸軍慎毋哭且飲金叵羅聽歌從軍曲自
隸綠旗籍俯仰苦不足官吏月散糧粟貴等珠玉昨夜
報出關名在公府臘餉家錢十緡登舟米千斛連艘下
橫洋橐弓且安宿遠聞賊兵來潛避竄空谷客舟焚一

空迴帆轉登陸賊至吾不迎賊去吾不逐談笑歸家門
還勝太平福卻是將軍功歲歲進官祿

六一山房詩集卷一

六一山房詩集卷二 王子癸丑

鄧 董 沛 覺軒

王子

有感

江鄉頻歲困風塵寥落村墟萬戶貧羣吏更徵滄海粟
縣官翻費水衡緝三司條例頒新格四野干戈號細巾
自昔明山稱樂土冀黃千古幾傳人

二

府海東南利自饒邇來課引未全銷場征亦是
天家稅壟斷何堪市儈驕勢到已窮憂反噬功原難濟

敢輕徼分明兩派潢池水逬作寒江一路潮

三

驛程飛馬去匆匆急羽調兵十郡中金柝夜催山月白
繡旗風捲火雲紅棠陰未戴循南政葱嶺難收定遠功

聞道

天恩減逋稅

詔書何日到江東

四

南城列戍北城開西渡鳴鉦大府來供億千金煩下吏
科名幾輩出奇才龍頭舊日詞臣策鵠唳中宵戰士哀

寄到征衫情脈脈月明愁上望鄉臺

觀官兵下南鄉

燈火遍江城傳呼夜點兵

朝廷防寇重官吏視民輕海曙樓傳鼓天靈寺作營

舊日

天甯寺時
改爲天靈閭閻皆赤子何忍致紛爭

三月二十六日紀事

朝報官軍來暮報官軍來官軍絡繹城門開城外之民
多哭哀哀聲喤喤盡室奔走長者攜兒少者扶母行臺
大官且飲酒朝飲百壺暮一斗朝飲已酣乃遣官軍南
官軍虎視何耽耽暮飲已空乃遣官軍東官軍殺人如

殺蟲鳴呼民何辜鳴呼民何辜駢首投行臺行臺大官
已沈醉明朝更遺官軍東誰道官軍入死地

二

五更出城天光未明中道安營大霧杳冥仰不見日俯
不見人但聞林木碭駭多殺聲官者呼兵船騎並行進
以鼓退以鉦有不率者就爾刑呼聲未已殺聲四起健
兒橫戈晨壓壘當其前者溘焉死眼看此軍無足恃狹
道逼水隘不成列投弓棄刀手無寸鐵前不能進後不
能退官者面面相對魂落膽碎岌岌乎危哉勢將敗

三

勢將敗可柰何跳刀走戟來者益多三日之前官軍來
蕩我室廬貽我災蕩我室廬繫我妻孥沈冤不伸鏤心
刻膚謂官軍其來歟曷不執梃曷不執鋤爾不挺磨爾
頂爾不鋤糜爾顱但見老者壯者少者拍手相招呼沈
沈四面張羅學官軍陷此安往乎前不能進後不能退
顛仆踐踏僵尸滿途莫辨其爲官爲兵爲役夫

四

督將死舟

張副將蕙郡判死水袁通判建峯

一家陣亡李貳公

琪

之父子孰爲舊令尹成泥首草閒良不忍投之以刀砉
然殞其餘將卒官吏二百人遺尸它籍無完身僅一龐

軀大腹辭參軍元成縛紮手足如圈豚渾流湯湯天低
日黃魚不能躍鳥不能翔捲旗束帳拋戈棄裳走不及
者爲國殤此三月中一日事我目擊之心惻傷

五

關城門關城門城門不得關逃軍入城逃民出城其勢
如崩山東街運貨西街停市呼呼噏噏汗出不止東門
鑿石西門掘木礮車壓城白晝鬼哭昔日官如虎百姓
如鼠百姓見官低首而愁苦今日百姓如狼官如羊官
見百姓掩面而章皇驅車驅車南城疾趨呼船呼船西
渡挽牽移糧慈谿移營東關官不得寐吏不得餐僅一

提軍一太守一縣官面面相對支絀艱難使我聞之心

膽寒

送仲弟

濂

之慈谿覓避亂處

事急難緩圖厄運竟成否罡風催閉門十戶九逃徙聞
昔官軍來焦面厲如鬼顧此生命微不直一羊豕近雖
遭敗奔烏從測其旨安知無憤兵報復逞長技鄉郡隔
一城相去等千里訛言日以多宵夢亦驚起鄰縣頗少
安迢迢隔江水行當謀所居凌雜措鹽米離此潢池中
緩急較堪恃汝行勿憚勞吾心聽所止

憶伯姊

嗚呼吾姊家近山良人不歸雛女屏孤燈夜接賊營火
虎口凜凜逃生難官河驛道多烽煙驕陽不豁河冰堅
大風捲幕巢燕死驚魂顛倒愁不眠

憶季弟

洽

嗚呼吾弟客遠方風塵道路阻且長鈴騎一夕過錢唐
家書抵得千金裝吾目望汝不能見夜以吾夢到汝旁
吳山月落天茫茫汝亦東望思故鄉

晤吳衛塘

德機

每憂不得見今日又逢君曠野飛燐火空山汨亂雲挂
冠聊避世投筆且從軍有志無相強休嫌出處分

贈翁葵園 培元

汝亦稱年少豪情眾所希果能夷世難何惜蹈危機對
月傾尊酒臨江浣戰衣奇功收指掌一笑死生微

口號四首呈段鏡湖司馬 光清

迴風頃刻掃邊塵苗格何須更七旬雲檄罷飛革子國
樓船分遣越王津

二

兒童齊唱太平歌滄海於今晏不波揮手千金懸賞重
拚頭一擲受恩多

三

縣平門賦籍舊同文草竊翻成將吏勳白戶羣安齊帝
詔黃巾都避漢家軍

四

我曾鈴閣獻書來區畫頻煩謗劣才但願閭閻頌樂社
不須名氏上燕臺

悼殤女蓮生詩

浮雲蔽秋月黯黮無餘光相推到骨肉使我心惻快生
女不生男門戶尚無託生女聊勝無以慰大母樂大母
憐汝慧膝下時相依汝頗解言語一一親教之那知領
刻閒遽賦殤女詩汝死亦已矣其柰吾心悲

二

汝母昔來歸嬌婉不耐苦三年井臼操蓬首倩誰語一
從孕汝後大母冀抱孫恐以勞致傷命之毋出門生汝
當夏五一陰得先兆汝母體素孱養汝苦乳少哺汝以
粉餌汝始不復飢汝卽不復飢猶聞含乳啼爾時聞汝
啼吾心悵以觸況汝一命休而聞汝母哭

三

吾身困單弱不耐秋風霜九月偶感寒頽然病在牀汝
母侍吾疾湯藥皆親嘗不暇顧汝飢不暇顧汝涼夜半
聞汝啼抱汝喂汝食燭燭孤燈明汝視不停息吾病漸

已瘳汝睡漸易醒每於三漏時聞汝呱呱鳴汝身汗不止夜起挑長檠汝母擁被池懷汝坐待明獨怪汝死時汝何不復哭使汝汙透裳汝命竟無續

四

釋氏語輪迴斯理殊惆然生兒不成立謂非父子緣汝來果何因汝死向何處一去無消息世人那知故家人環向汝有淚皆盈願汝死已多時猶置大母懷汝叔自塾歸聞信卽哀慟寒風夜打門葬汝猶相送寒風蕭以瑟吾心慘以悽吾心耿不寐汝魂渺何之茫茫天地中浩劫如飄輪霎花一現後誰挽青陽春

東山

東山高不極倒影入吾家斜日無餘思閒吟數落花

癸丑

朱千戶 駿 挽歌

潯陽江頭怒潮起飛礮轟轟晨壓壘朱公慷慨烈丈夫
束髮從軍到頭死嗚呼公一卑官耳生不得紆紫綬綰
金章而胡爲乎一死竟如此連環鎖甲血濡紫瞳眼如
輪貫流矢千夫之長千人英死是乾坤一男子君不見
狐降鼠竄江上營大帥千里逃殘生逃生不生溘焉死
狂寇已逼金陵城長江天塹可飛渡鐵馬嘶空氣成霧

惟公手揮丈八矛兀立邛山阻衝路勢危力竭身死之
部曲分散無子遺白楊蕭蕭朔風起冷月殘星鬼守尸
睢陽厲鬼能殺賊不死者心死者職至今荒荒老鼠峽
千戶死
節處猶聽忠魂長太息

聞警

五載流亡痛已深

王師計日下平林誰書磨盾三千檄但聽寒衣十萬疋
殘驛西風屯卒怨空闔落月美人心銀河未洗兵戈氣
閒對秋宵淚滿襟

纏花開落紫荆山

賊起事處

舊日潢池此扼關狡兔尙爲營

窟計亡羊應悔補牢難

叶

招安自古無長策縱敵愁伊

有汗顏百萬金繒供一擲兩階猶道格苗頑

三

永安城外雪霏霏戈甲森嚴大合圍諸將盡施三面網
九重深望一戎衣妖星斜指橫江陣危壁孤懸映日旛
堪恨周防猶未密亂鳥一夕各分飛

四

使相旌旄大將旗

帝教臣度握雄師空將朽骨標神駿幾使遺洩餉佛狸

萬戶荒涼新鬼哭于秋功罪史臣知上方何日誅羣寇
辜負當年賜劒時

五

前鋒遙指桂林城度嶺何須一日程誰遣客軍屯鄧岳
已從閒道下郴衡猛如周泰庸何濟望似姚崇浪得名
惟有峴山碑墮淚斯人早逝柰蒼生林文忠公至粵賊
議縛渠以獻公發事遂

六

三楚縱橫作戰場左聯潭郢右辰常中遠莫定哀鴻迹
絕域何來貢蠹香冒索金貂頌僕隸濫收銅馬補戎行

飛符移建南徐節猶自遷延誤此疆

七

羣山夏口鬱崔嵬陣陣寒鴉送夕暉汗馬幾聞神將力
滾龍難禦佛郎機遺民尙作登陴守懦帥多緣乞病歸
青草湖頭青草色碧鱗紅燒已全非

八

湖口宵懸萬炬明溫侯猶鼓帳中等疑從鄰壤乘虛入
卻渡橫波蹈險爭風捲繡旗童子隊賊中有孩兒陣雲屯錦騎
美人兵賊以婦女兩喊助戰自來南北分天塹那可倉皇避敵行

九

拱衛全吳據上流黃州形勝對江州望塵莫去教曹蓋
橫海應聯越國舟小吏傳宣多赤手異軍特起盡蒼頭
東南生計關天下奚慰焦勞

聖主憂

十

傳報樓船逼小孤九江城內亂如烏聞風已類開門揖
涉險何能裹甲趨諸將拔營俱左次敗兵沿道作先驅
新亭白石焚舟上誰向南燕召寄奴

十一

西來突將本無前休道淮淝壁壘堅采石有橋迎武惠

舒城無廟祀忠宣迷津舸艦黃龍接麗日旌旛白虎懸
忠義儒林難合傳悔將性理說先天

十二

聞道金陵一昔危岐陽龍種已無歸不教徐盛屯濡塢
竟使王琳出合肥半壁江山銷劫火六朝亭館贖餘暉
可憐碧葬全城血猶見忠魂向

關依將軍祥厚都統霍隆武
率駐防兵闔城畢命

十三

大江滾滾截金焦北府城頭虜氣驕邊郡屯糧惟濟敵
海門懸鎖尙通潮吳宮彫落秋風樹隋苑淒涼夜月橋

一片江都行樂地至今惟有亂啼鴉

十四

指掌河山眇自雄妄援漢制惑愚蒙徒畱優孟衣冠樣
不改臣佗祚結風水族加恩新底簿臺城僭號舊離宮
盛朝典禮煌煌在要使殊方會大同

十五

羣公濟世有經綸冠佩趨朝拜疏陳上策籌邊惟納粟
臨時救火且移薪妖氛漸入中原地廢室深悲草莽臣
極目蒼生都望治東山小草是何人

梁湖大水歌

梁湖六月多水災我獨胡爲從軍來罡風陣陣挾龍氣
雷鞭一擲山明開連旬急雨萬矢疾貫入危牆勁如鐵
溪流下注河流高巨浪排空滾飛雪樓廬出沒波濤中
城門如橋篙楫通曹娥決口不復合大江故道西混東
居民畏死向舟伏巨舟傾側小舟覆朽棺亂竄入人家
鬼亦無鄉可受哭鷗鷺上樹爭鵠窠樹頭繫纜漁船多
漁船有魚不得買我亦無米愁柰何錢唐破陣載歌舞
樓畝餘糧曠荒土奉檄催租不得遲老農低頭淚如雨
西來寇盜蟠三吳湖巖接境形勢孤如何腴田化澤國
大兵竟與凶年俱高高者天亦難恃忍使吾民作流徙

我生之後逢百憂重以追呼酷刑死中達中澤啼哀鴻
宰官但說倉儲空平生不識救荒策令我太息富韓公
噫吁嚱令我太息富韓公

贈王勑泉

芬

六載相思夢寐中片帆何幸到江東山林著作千秋業
風雨淒涼一寸衷臣不如人甘放廢君猶知我是英雄
旅窗此夕流連話倚燭長看勑氣紅

同謝方齋侍御

榮棣 何叢民戶部

惟俊 飲酒

庭樹蕭疏感客心華堂六月氣陰森嫩寒入戶衣猶薄
豪飲當筵酒自斟何遜文章無俗骨謝公絲竹有元音

遙知江上峯青處不斷鄰家思婦砧

題義橋驛

越國山川霸氣銷西風吹客過津橋馬頭秋色吳江樹
一帶征旗拂柳條

晚渡錢唐江

千軍屯百舸飛渡下錢唐帆力驅風健燈光射水長夜
深更柝亂秋老戰衣涼遙指江邊路前麾出富陽

成七里瀧贈徐鐵菴參戎

元鎮

百戰歸來死後身征衫猶帶血痕新臨風幾點英雄淚
半爲君恩半爲親

軍營雜詩

羣灘束流石骨險鐵鎖雙環綯大艦旌旗不動霜天高
飛礮轟轟墮鴉燄此時此境吾在營滿山落葉秋氣清
官軍昨夜退分水檄書早到嚴州驚

二

防江列戍貔貅雄五日一校刀矛弓諸軍赤體狎蛟蜃
酣呼出沒洪濤中萬顱攢水沈到底一躍登舟疾如矢
忽聞使者犒軍來更向前船運芻米

三

長燈挿肩刀挿腰柵門夜閉銅鈴搖騎馬出營警行列

寒風刮面雙鬢凋銀河沈沈萬動息月黑天低斗柄直
男兒意氣凌八垓欲駕高空奮無翼

嚴子陵釣臺

獨有傷秋客登臨意氣豪長空木葉下終古釣臺高一
去冥鴻隱孤峯病狹號至今巖下路流水總滔滔

送章采南殿撰鑒入都

舊是蓬瀛客飄然又入都經綸需內相風雪載前途驢
背詩猶健龍頭望不孤吾

皇方典學何以贊

宸謨

六一山房詩集

卷二

三

二

珍重河梁別，臨歧倍愴神。
關山多險阻，淮海更風塵。
良史畱君在，艱時獨我貧。
和章曾有約，鄉訊待明春。

夜泊銅盆浦

江風捲樹夜颼颼，倦枕寒燈倚佩刀。
啼鳥一聲驚客夢，碧天無盡月輪高。

六一山房詩集卷二